

05. november

UKA2018/103

**Inuussutissanik allagartalersuisarneq pillugu Namminersornerullutik Oqartussat nalunaarutaanni nr. 1-mi, 2. februar 1994-imeersumi § 11 imm. 2 nummer 1-p allanngorteqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut, nalunaaqutsersuisarneq aamma tuluttut pisinnaanngortillugu.**

Siumumiit inatsisartuni ilaasortaq Steen Lyngø Demokraatinerseq siunnersuutaanut imaattumik oqaaseqassaagut.

Siumumiit siunnersuuteqartoq qutsavigissavarput niuernerup silarsuaanut aaqqiissuteqarniarluni siunnersuuteqarmat.

Siumumiit siunertariurparput pitsaasumik nunat allat niuernikkut ajunngitsumik suleqatigilluarnissaat. Tulluit nunaat niuernikkut pitsaasumik suleqatigisimavarput ukiuni arlalinni.

Siumup pingaartippaa Canadap, USA-p Islandillu suleqatiginerat annertunerusariaqartoq, niuernermi aningaasartuutit appasissuutinnissat siunertaralugu. Ilinniarluarsimasortavut atorluarlugit USA-mi Islandimilu aallartitaqarfeqalersimanitsituut tullinnguuttut Canadami Kinamilu aallartitaqarfeqalernissarput anguniassavarput.

Nanatsinni Avammut niuernerup ineriartortittuarniarnissaa, iluanaarutaanerunissaa isumannaattuunissaalu anguniarlugu Avammut Niuernermit Siunnersuisooqatigiit immikkut ilisimasalinnik inuttalersugaq Siumut pilersinniarpaa.

Nuummi talittarfissuaq atorluarlugu Nunatta avammut niuernera piaartumik nukittorsarneqassaaq, nunanik allanik niueqateqarneq toqqaannarnerusumik ingerlaartussanngorlugu. Taamatullu avammut niuernermi nunatsinni mittarfii anginerusut aamma nutaassat atorluarneqarnissaat Siumup aqutissiuunniarpaa.

Siumup anguniarpaa nerisassat peqqinnartut ajornannginnerusumik akikinnerusumillu pisisartunut annguttalernissaat. Peqqinnissamik suliaqartut niuertarfillu suleqatigiinnerisigut innuttaasut peqqinnerulernissaat anguniarneqassaaq, taamaasilluni nappaatit inooriaatsimik aallaveqartut annikillisarnerneqassallutik.

Taamaammat siunnersuuteqartup siunnersuutaanut isumaqataalluta nutarterisoqarnissaanilu pingaartitaqarluta naalakkersuisut allannguutissatut siunnersuutaat ilalerparput, ataatsimiititaliamullu susassaqartumut ingerlateqqinnissaa innersuussutigalugu.

Oqallilluarisilu

Mala Høy Kuko, Siumut